

## wainachdn

---

neemä a fichdn orrä a danna  
dummä lamedda no orrä englshoä  
dummä wachskäddsn drauf orrä äläggdrischa  
ässmä a gons orrä a endn  
dringmä a biä orrä an wain  
dummä örschd ässn orrä örschd bäscheern  
neemä äs guuda gschirr hoid scho orrä örschd morng  
lisä forrä di wainachdsgschichd foä orrä di klää  
schdellmä hoid scho di hailing drai könich auf orrä  
örschd näggsdn sundooch  
soongmä deä klann äs griskind hodd än baam gschmüggd  
orrä deä babba  
singamä o dannabaam orrä schdilla nochd  
maansdä schloofondsuech bassdä orrä solli na umdauschn  
heemä äs gschengbabiä auf orrä dummäs fäschüän  
gemmä um fümefa nai di kärng orrä nai di meddn  
schaumä om örschdn faiädooch baidä dand madda fobai orrä  
om dswaidn  
ässmä bläddsla orrä an schdolln  
machmä an bunsch orrä an glüüwain  
lossmä di käddsn roobrenna orrä bloosmä si aus  
hosd edsd dä oma a kaddn gschriim orrä müssmä nuch noo  
fälld näggsds joä dä hailich oomd auf an samsdooch orrä  
an sundooch  
gemmä nain bedd orrä blaimä nuch a weng auf  
neemamä neggsds joä a fichdn orrä a danna  
dummä neggsds joä lamedda no orrä englshoä  
dummä neggsds joä wachskäddsn drauf orrä kaaf mä äläggdrischa  
ässmä neggsds joä a gons orrä a endn

...

---

